



MAMU TSHISHKUTAMASHUTAU INNU EDUCATION

# INNU AIMITAU: NATUASHISH ESHI- AIANIMUANITSH KAIANIMUEKATAKANITSH

2024 | epishiminishkueu



Mamu  
Tshishkutamashutau  
Innu Education

# INNU AIMITAU: NATUASHISH ESHI-AIANIMUANITSH KAIANIMUEKATAKANITSH

2024 | epishiminishkueu

## Tshinashkumetinau

Mitshetuatsht innuatsh takushinatsh tshetshi minupanatsh mamu eianimuanitsh. Nui nashkumauatsh anitsh innu-aianimuetsh, uenuitatsh etenitatsh, enu innu-aianimuanu mak innua eshi-inniunitshi, mak enu katshishkutamatsheutshuapinu. Nui nishkumau Mani-Shai Edmonds, Nuna Pasteen, Shuashim Nui, Anishei Pasteen mak Tshan Nui. Nui nashkamau eiapitsh Nasheu eshi-minushishinitshi utakunikaia ete nushimitsh ekunitshet auassa ka pimutenitshi. Mak nipetuariatsh auassatsh naianimuetsh katshishkutamashutsh, Shikaina mak Anishtesia Katshinak. Mak ninashkumaiai Ava Provencher unuitshinimit. Mak minuatsht nui nishkumau Mani-Shai Edmonds uenuatshinimit tshashikanitsh mak Ema Ashini e uauitshinimit eiashu-uitamunimit, mak iapitsh Penash Rich unuitshinimit uenu mashinanikannu etutamutshish. Mak katshishkutimatsheutshuapitsh innuatsh ka atussetsh uanuitshinimitsh menushtashutshish. Ralph Clark petushtau ka-uish tsheuepanua aianimuanetshi. Mak Navi Tretina ka akunitshesht tshashikanitsh. Mak tshitshue ninishkumaiatsh innuatsh tekushinitsh ashinepanitatsh tshetshi natutatsh mak ka uinuau unuitatsh etenitatsh tshetshi aianimuanu.

Mak innu ka nishi-inniut ue mamu ka-taianua nishinikateu Indigenous Languages funding, anite uetshpanitsh Tshishe-utshimau shunia.







Niminueniteiai katshi takushiniek<sup>u</sup> anutsh. Tshika mituashunanu, tshet tipatshimunanitsh. Apita-tshishakatshe tshika aianimuekatakanu tan tshipa ishi-tutenan tshetshi etatu auassatsh tshissenitatsh utinniunuau mak utaianimuauau.

Tante tshipa tuteiai tshinai innuatsh mak kashishkutamatshetsh? Tshokuan tshipa tutam<sup>u</sup> katshishkutamatshetshuap tshetshi etatu nukuatsh innu-aimun mak eshi-inniunanitsh? Tan tshipa nishi-uitshinueuatsh utshimauatsh mak anite kutakatsh innuatsh ka atusseutshi? Tan tshipa nishi-uitshi-atussemitunai tshetshi minupanitsh?

Tshika ispitenitakuan tshi apita-tshishikatshe. Tauatsh ussinitshuatsh kanishkutamatsheshitsh mak akushiu-kaiatusseshitsh, ussinitshuatsh mak ka tshishenniutsh. Nasheu uapatinue-unitsh kashetshimakanitshi ene auassatsh ka pimutetsh ete nutshimitsh, napessatsh mak nishkuessatsh. Tshka uapatinueu kashetshimakanitshi enu eshi-minuashenitsh nutshimitsh mak e minuashenitsh e papamutanitsh mak auassatsh eshi-minuenimutsh ete nutshimitsh. Nasheu kaiakutshet mak shutshiu e pimutet.

Nui uiten apishish nitipatshimun. Innuatsh nutaun mak nikaun mak mushinau innu-aianimeuatsh. Ushkatsh tsheshkutamashunan Kindergarten etapanan une 1971, muk<sup>u</sup> nitinnu-aianimueiapan, kueta petaman kakeshau-aianimun. Euassiuian niteniteiaiapan eku nitenite kakeshau-kanishkutimatsheutshuapitsh menuatsh tshetshi taian. Patetash etatupuneshian nueshimikun etenitaman kutak inniun etatu minuashipan at mak nin nitinniun e innuian, nasht ete nishpish nianeu etapian eshi-tapuetaman an etenitaman. Nutaun mak nikaun ama etatu nitshisseniten. Nashtish ama tshissenitamuatsh enu kutakinu inniunnu, kanishkutamatshetshuap, kauapikueshitsh tanite nikaun mak nutaun ete ututeuatsh nutshimitsh.

Ushkatsh tsheshkutamashunan mak nika-mun nekamunan ishinikateu “Peikunnu kaia-pissishitsh kautashapitsh”. Ama nitshissenite-iaiau unaushinatunanitsh an nekamunitsh nikamun. Niniminai niti apishissinai iapitsh. Nutineiai kutak inniun tanite nitutakunai tshetshi tshishkutamatshetsh. Ama takunipan nashtish tshetshi innu-tshinishkutamuakanit auei. Niminueniteiai tante nikaun mak nutaun innu-aianimuepanitsh.

Anutsh u, ukaumuautsh kakeshau-aimeuatsh utauassimuaua. Auassatsh shetshimauatsh enua “Cocomelon” ishinikatakanua. Anamin eshi inniunanitsh anutshish mak tshtishue mashkuau. Tshash anita tshitaitai tshetshi unaitaiak<sup>u</sup> esh-aianimuiak<sup>u</sup> mak eshi-inniunak<sup>u</sup>. Nashtesh ama niminuenimunan anutsh u, tanite nika keshau-aianimueutsh nussimatsh nanikutini, mik<sup>u</sup> nipa innu-aianimuemapanatsh nussimatsh.

## NUNA PASTEEN



**A** namuekatetau innu-aimun mak eshi-ishpitenitakuak. Etuatau nipushinan ete Kawawachikamach mak ete Uashat, innuatsh nuitamakuatsh eshi-shutshimakatsh mushuau-innu-aianimun mak tshetshi eka unitaiak<sup>u</sup> tshitaianimuanu. Ute katshishkutamatsheutshuapitsh nipetuauatsh auassatsh kakeshau-aimuatsh. Tshitshue nimatshenitei nin. Innuatsh tshipa innu-aimuieuatsh utauassimatsh. Nanikutini nitshuapin panetikuau nussimatsh kakeshau-aimutuau.

**M**ushinau nuitamuauatsh tshetshi innu-aianimueuatsh. Nikutshituau tshetshi tshishkutamikau tshetshi innu-aianimuetsh. Nussim tshitshue kutshitau tshetshi innu-aianimuet. Euassit tshitshipanipan e kakeshau-aimit. Nuit-amuauatsh auassatsh ui natutakushineku tshika innu-aianimueiau. Ninatu-mishkumuai tshetshi tshishkutamikau tshetshi innu-aianimuetsh.

Nutshimitsh ete ninitautshin, nikaun mak nutaun nuitshimapanatsh mak tshitshue nitishpitenitan anutshish. Nimishta-tshishkutamakun ete nutshimitsh nikaun mak nutaun uatshimikau mak kutakatsh innuatsh. Nipa tshi tuten muk<sup>u</sup> tshekuan eshinakuak ete nutshimitsh etaiani. Nuapaten eshi-mishta-atshipanit tshekuan, utapanissa takuan mak enua kutak tshekuaanapanitshi. Petshi nitautshinan nutaun nuitamak<sup>u</sup> tshetshi nataman mita, muk<sup>u</sup> tshimiputakan mak akatashk<sup>u</sup>. Nitashkai mita kuet tshiueshtanan ete nitshinatsh. Anutsh u mishue tshekuan eku ka-papanua apatshitakanu. Nimitaten ana nutaun ka uitsheuk e natuiutshe. Mushinau nimamitunenitei eshi-shutshitsh nutaun mak nikaun. Niminuenitamuau eshitshishkutamatshetsh.

Peikuu mishue auenitshi tshiuatsh muk<sup>u</sup> nin nuitapimauatsh nikaun mak nutaun. Tshitshue niminuenitei etishumikunan tshetshi pimipanitai utapanissa Elan. Nutaun uitsheuakaia

## NUNA PASTEEN

niminikunua passikannu kuet ishit “matshi natuapamitsh pineuatsh”. Kuet natuineueian, tshitshue mitshetuats pineuatsh. Nipassuauats muk<sup>u</sup> nashtish ama nipauats. Tekushinian ete nitshinatsh, nutauin nitik<sup>u</sup> “ma tshi kutshita tshetshi mishue apatshitanit tshitshissikua”, kuet nitau “ehe”, Nitik<sup>u</sup>, peik<sup>u</sup>, muk<sup>u</sup>, tshitshissik<sup>u</sup>, apatshita”, Minuatsh tshishtitshakun tshetshi nituineueian, eukuan nepakuau pineuatsh. Niminueniten nipakuau pineuatsh mak tshauetakuau.

1996 nutaun uniepan uitshiuakaia kuet apu nita minuatsh itutet ete nutshimitsh. Mak nin. Patush ene 2003 tshatshipanan etuteian nutshimitsh. Nitanimeniten mak mishkuau tanite nishteshapan itutepan anite nutshimitsh. Kuet maian e tueunats. Mak niminueniten.

Eshk<sup>u</sup> nutshimitsh mushinau nititutei. Eukuan anutshish nitshishkutamuauats nitauassimatsh mak mushinau nititutei nutshimitsh eshakumipipuna. Tshitituteiauatsh auassatsh anite shakunitshi mak tekatshinitshi. Ushi-pipunutsh nish<sup>u</sup> napessatsh tshitshue minuenitamuats. Tshinetshishepatsh natuiunai mak nikusseiai. Nikuss pimipanitau utinu, uitsheuakaia uitsheue. Nitshishkutamuauats mak mitshenu tshekuannu kuekuetshimitsh.

## ANISHEI PASTEEN

Ama nita nikakeshau-aimunapan ueshkatsh tshishkutamashunan. Nitinnu-aianimueiai kashkutamatsheutshuapitsh. Tapan innu-tshishkutamatshet aiamieunu mak tapan innu-tshishkutama- tshet innu-aianimuanu. Anutsh u, nitanish tsheshkutamashut, apu nita uapamak tshetshi tshishkutamashut innu-kapapeikush teshitshi. Ama nita nipetua tshetshi nissishuet ‘a, e, i, u’. Mishue tshekuan tshish- kutamakuiats ete Utshimassitsh atshipanu. Ueshkatsh natikuanitsh auassatsh ama tshishkutamashuatsh aiamieunnu. Nimushumipan tuteupan kashetshimakanitshi The Two Worlds of the Innu. Nissishuepan eshk<sup>u</sup> ete auassatsh muk<sup>u</sup> tshika kakeshau-aimuatsh. Tshe eka tshi innu-aianimueutsh. Tshe eka tshi nishtuaiats tshekuannu essishuetsh. Tshash an tshitshipanu.



Nui uauiten auassatsh mak anitsh ka pun-tshishkutamashutsh katshi tshitutatsh katshishkutamatsheutshuapinu. Ta eni enua atusseuna? Nuitamuapan nikuess katshi tshitutak katshishkutamatsheutshuapinu tshetshi etatu tshishkutamashut, kuet issishuet “ehe”. Eshk<sup>u</sup> ute tau. Mak nussimatsh. Peik<sup>u</sup> nussim kakeshau-aimini, mak mushinau nikutshitauai tshetshi innu-aimakuau ama tshi issishueu. Tshissenitam<sup>u</sup> kie nishtutam<sup>u</sup> innu-aimunnu, muk<sup>u</sup> kakeshau-aianimueu. Tshuni-taiu. Etu auassatsh tshika ui tshishkutimashuatsh innu-aianimuan.

## SHUASHIM NUI

**N**ui uauiten uipatsh ete euassiuana, tan eshipanitsh tshittinniunan ma ka ishi-atshipanitsh. Ninai u innuatsh ka papaitshitsh mak ka natuiutsh. Innuatsh ama nishipte nimushupanatsh, mishue auen, tshishennatsh, ukaumuauatsh kie utamauatsh mak auassatsh. Atik<sup>u</sup> u. E nepatakanitshi tshekuan, mishue minutakanu. Nishkueuatsh takuan eti-atussetsh mak napeuatsh. Nikaun tshishkutamuakanu tshe ishi-minukuat atikua mak napessatsh tshishkutamakuatsh utauaua tshe ishi-natutikuatsh mak kutak aeshisha tshetshi nipaiatsh. Anutshish, mishue tshekuan e tutakanitsh tshitshue



uetin, tanite mishue tshash papinu etapatshitakanitsh, mak pimin apatshiakanu. Ama nishinakanipan ete uipatsh. Uipatsh ete ama tapanatsh atimuatsh. Utopaiashkuatsh muk<sup>u</sup> utapenanipan eshk<sup>u</sup> pepamipitshinanitsh. Atik<sup>u</sup> nuitsheuaiau. Ama takuanipan tshekuan pepanitsh muk<sup>u</sup> utapaiashkuatsh tapanatsh.

Euassiuana nutaun nuitsheuapan ete Sheshatshit. 1941 une. Ama takuanipan Kuspe eshk<sup>u</sup> kuat petaunakanitsh kaiatusseshitsh mak uta papinua anite Kuspe utshipanua, petaunakanuatsh napeuatsh mak enua tshekuaia tshe apa-

tshitakanitshi atushkanitshe. Nuapamaiatsh kakeshauatsh. Ete nitinniun Kameshtastan. Nimishta-tshishkutamak<sup>u</sup> nutaun muk<sup>u</sup> e tshitapamak tshekuan e tutak. E ashimatsh tshishkutamashuatsh tshetshi kashiutsh e tutakanitshi pishakaiassina muk<sup>u</sup> e tshitapamatsh nikaun e kussikuashunitshi mak kutak tshekuaia e tutaminitshi. Katshiuatsh tshetshi ushiatsh asham mak tshetshi assimetsh. Innuatsh shutshiuatsh anite nutshimitsh etatuauu mak kassiuatsh tshekuaana tshe ishi-tutakuau. Ama tapan kakeshau. Ama tapan tshishe-utshimau.



**A**ma takuanipan kakeshau-aimun mak ama takuanipan mashinanikan. Eshk<sup>u</sup> eka nipaunan, tshash nitshisseniteiapan tshekuan eshi-tutakanitsh.

1948 eukuan tshishe-utshimau etutanimitsh ete Nutak. Ut nitapatshitaiai mitshima anite Nen. Ama nitsshisenitei tshekuan. Ekute ete etashumikuaiatsh tshetshi taiatsh. Mitshetu tapue aueshish muk<sup>u</sup> ama minupanatsh. Nasht anite mushuau, ama tauatsh mishtikuatsh mak aueshishatsh. Ama niminuenitam<sup>u</sup> tanite mitshima anita takuan nipin. Ama tapan kun. Katshi nishupipuna eku etu-teiatsh ete Kauishatikuanitsh tshetshi minu-inniunatsh mak tshetshi minupiaiatsh. Atimuatsh niminikunai ete Nutak kuet apatshatshitsh atimuatsh tshetshi utapetsh utapashkua e tuteiatsh nutshimitsh. Inniun minuau. Niminu-inniunan ete nutshimitsh.

Ama takuan shitaunapun mak ama nita nutshikatunanu mak uauitshinituatsh innuatsh. Nashtish ama takuan tshekuan e animak. Ama takuan tshe utshimau-atusseun muk<sup>u</sup> innuatsh uauitshinituatsh etussetuau. Ama takuan iapitsh shunia. Muk<sup>u</sup> uauitshinitun takuanipan. Eukuan eshi-uapaman.

**K**uet kakeshau petak kamatshikaunitsh tshet mishue tshekuan atshipanitsh. Nitu-takunai kamatshikauatsh tshetshi unikuatimatsh eshi-inniunatsh mak anite uetute-iatsh. Ueshkat unapamak kauapikuesht 1950. Ishinikatakanu kauapikuesht Father O'Brien petutepan ete Kauishatikuanitsh tshetshi shikanituat auassa mak nipauinueu. Innu-aianimueu kauapikuesht. Peik<sup>u</sup> minashtakai tau uin kuet tshiuapanit. Auassa tshishkutamueu aimieunnu anite nutshimiutshuapitsh. Ama takuaia eshk<sup>u</sup> mitshuapa. Aimieu-mashinanikan nitapatshitaiau mak nishipanatsh kauapikueshitsh mak innu-aianimueuatsh.

Nitinniun tshitshue minuapan. Etau katshishkutamashunai tshetshi minu-inniunatsh. Innuatsh tshishkutamuakanuatsh tshe ishi-aimitushuatsh mak tshe ishi-aimitatsh aimieu-mashinanikannu. Mitshetuatsh auassatsh mak pakuenitamuatsh tshetshi tshishkutamashutsh ete Utshimassits. 1967 mishakauatsh kakeshau-katshishkutamatshetsh mak ama tshi innu-aianimueuatsh. Mishue kakeshau-aimuatsh. Mishakauatsh ute nitassinatsh tshetshi tshishkutamuatsh nitauassiminaia mak nussiminaia.

Neushish tshishe-utshimau issishueu ama tshika tshi tshishkutamuakanuatsh auassatsh aimieunnu mak ama tshika aiamituashunanu.

Tshishennuatsh ama minuenitamuatsh nekatishinakanitshi tshipaiatikua anita katshishkutamatsheutshuapitsh, eku auassatsh ama tshi tshishkutamashutatsh aimieunnu. Kakeshau-tshishkutamuakanuatsh auassatsh. Animan anutsh u, ussinitshuatsh ama tshisenitamuatsh eshi-inniuitsh. Ama tshi mitimeiai meshkaiau anite ka minuatsh uetuteiak<sup>u</sup>. Napeuatsh utineuatsh nishkueua tshe uita-pamatsh. Ama niminuenitei ka tshishkutamuakanutshi auassatsh aimieunnu mak aimieu-mashinanikannu. Anutsh u, tshitshue animan tshetshi ishi-inniunak<sup>u</sup> ka ish-inniunak<sup>u</sup> mak tshetshi ishi-inniuiak<sup>u</sup> ka ishi-inniutsh tshimushuminuatsh mak tshukuminaiatsh. Ama nitshisenitei tshetshi atussemakak.





**N**uitamuauatsh nussimatsh enu eshi-aianimueiak<sup>u</sup> tshash nipimakan. Tshika animan tshetshi tshishkutamuakanitsh auassatsh eshi-inniunanitsh ete nutshimitsh. Auassatsh ama shuka innu-aianimueuatsh. Etatu kakeshau-aianimueuatsh, nameute anite muk<sup>u</sup> katshishkutamatsheutshuapitsh iapitsh anite uitshuauatsh. Tan tshe nishpanitsh? Ama nuapamau auen tshetshi ushiat ashama. Nanikutini niminauatsh ussinitshishuatsh mak nitshishkutamuauatsh tshetshi tutuatsh. Tshishipanuatsht mak minunakuietsh, eku anutsh u ama shapenitamuatsht tshetshi tutuatsh ashama. Mishetuatsht innushkueuatsh eshk<sup>u</sup> etitatsh ukauaua eshi-tshishkutamatsh, eshi-assimanitsh ashamatsh, eku tshash ama tauatsh auenitshi tshe tshishkutamatshet tshe eshi-assimeianitsh ashamatsh. Ama tshinakatueniteai eshi-inniunak<sup>u</sup>.

Anutsh u, tshitshue mishta-shapanu tshekuan eshi-inniunak<sup>u</sup>, ishkuteuapun takuan mak matshinatukuna kie ishkuessatsh piuenamakanuatsh. Atshipanu eshi-inniunak<sup>u</sup> mak ka ishi-inniut auen ama takuan. Nimueshtatei, ama nitshi natamueu ena tshinitshinikunuatsh ka nakatatsh. Animan tshetshi uapatamak<sup>u</sup> auei u tshinai.

Eshakum nipina, mushinau tutakanu kamamuinana mak innu-aitun ka-ishinikateua. Nuapamauatsht innuatsh nutshimitsh e tutetuaui mishue tshekuannu petautsh utashpishimunua, ashpi-mitshi shuakaiatik<sup>u</sup>, kashetshimakanitsh kauishi-nukushutshi, unakaia mak kauishi-pimpanua uashtenipimakai. Uipatsht ete ama nita enu innuatsh itipanatsht. Eukuan iapitsh nekatishinak tshitinniunanu. Auassatsh tshissenimeuatsh eshi-mitshetitsht tshishennuatsh nekatikutsh — nitshishennimianiatsh, nikatshishkutamatshenimaiatsht. Nimista-mamitunenitamunik<sup>u</sup> tshishe-utshimau katshi ui tipenimikunaiaua muk<sup>u</sup> ka-ui utinamua eshi-inniunak<sup>u</sup>.



## **CAMILLE FOUILLARD**

**N**itishkumaiiau tshishennu katshi uauitak utipatshtimuna. Mishta-petakuannu tshekuannu tshetshishep unauitakanitsh eshi-inniunanitsh mak aianimueun innu-aiamun, mak tan eshpanitsh katshishkutamatsheutshuap ete uipatsht mak anutshish. Napeteaiaia ukaumuauatsht mak ukumuauatsht eshi-kakeshau-aimaiatsht utauassimuaua. Muk<sup>u</sup> eshk<sup>u</sup> mitshetuatsht innuatsh e innu-aianimuetsh. Muk<sup>u</sup> tauatsh eshk<sup>u</sup> innuatsh kessiuitsh tshekuan eshi-tutakanitsh enu innu-iitun ka-nashinikateua. Shuashim tipatshtimu tshishkutamuatsht enua napeua mak ishkuaua eshi-ushakanitshi ashama. Eukuan nanamuekatikanitsh anutsh ka-aianimuanua, eku tatipan tshika utsh auenitshi tshe aianimuetsh enu tshika uauitamuatsht tan tshe eshi-uitshi-atussemituiak<sup>u</sup> tshetshi pimpanit tshitinniunnu. Tshi apita-tshishikatshe auassatsh tshika petuakanuatsh etenitatsht kie uinuau etenimutsh mak tshekuannu tshipa minuenitamuatsh tshetshi uapatatsht.

## TSHENI GREGOIRE

**N**itatushkanikunapan tshetshi uitshi-atussemakut katshishkutamatsheutshuapitsh. Kanani Penashue nuitshi-atussemau kie anite mautsh auenitshi ashutash-tatunnu etatupipuneshitsh. Mamunakuannu tipatshimun an katshishkutamashunanitsh mak uitamuakanutsh innuatsh tan eshi-uapatatsh ete ushtetshe mamu enu nish<sup>u</sup> katshishkutamatsheutshuapa mak tshe ishi-katshishkutamuakanitsh auassatsh. Nitishkumauatsh auenitshi manatsh tshetshi kie nin uauitshinueian mak eshi-inniuinak<sup>u</sup>. Eshi-atushkataman mak aimikuau tshishennuatsh, nipeten etatu innu-aianimuan unauitakanitsh anite nitetshe auassatsh. Eukuan etishinikuan tshetshi atushkataman. Ui atussenitamekue tshe, tshe aiminek<sup>u</sup>. Put kie Facebook Page tshe mashinamunek<sup>u</sup>. Eku etashtetsh nikamatuetshim 709-217-8253 mak ui mashinamunekue ute tshe petashumek<sup>u</sup> jgregoire@innueducation.ca Tshinashkumitinau.

## SHIKAINA MAK ANISHTESHIA KATSHINAK

Anutsh auassatsh nutshikamuatsh kamatshikaunitsh, ama niminueniten mak kueshtetshe atipanan ete utenatsh taian. Muk ama nitshi tuten. Ekute ute uetshinan, ama nui uepinen uetuteian. Ute utenatsh namueshtatshinikun, muk<sup>u</sup> iapatsh nititeniten tshika uemapanu an etenimunan. Nui nishtutei tshekuan uish ishinakuak nutenamanam en anutsh eshinakuak. Nishakuenimun mak nitshisseniten inniun eshk<sup>u</sup> pepanitsh. Niminuenitei mak niminuenimushun. Eka tatakue nikaun ama nika tshi taiapan. Niminuenitamuai utanishitut. Auassatsh tshika ui tshissenitamuatsh anite uetutetsh mak tshika ui tshissenimitishuatsh eshk<sup>u</sup> eka iatapa pimutetsh meshkaianu. Nuapamauatsh mitsheuatsh auassa pituautsh, ama nititamenimauatsh. Auassatsh utinamuatsh tshekuannu eka minuanitsh tanite ama minu-nakatuenimakanu.

**A**uassatsh tshipa minuanu tshetshi kushpaunakanitsh. Tshipa metueuatsh mak tshipa kusseuatsh. Mishue uikanisha tshipa kushpinua, tshitshue tshipa minuenitamuatsh.

Passe auassatsh ama nita kushpuatsh. Unishinuatsh. Auenitshi kessiuatsh tshekuannu tshishkutamueuatsh kutaka auassa. Tshipa ishinikatakanuatsh Bandit Queens. Tshishennuatsh tshipa tipatshimuatsh ete uipatsh mak tan ishinakunipan ete. Auassatsh tshipa minuenitamuatsh mak tshipa takuannu tshekuannu tshe tutatsh. Unitaiakue tshitaianimuanu, tshitshue tshika ui ushkuinai tshetshi mishkashunak<sup>u</sup>, ama tshui anite uapateian tshetshi ishinakushiak<sup>u</sup>. Mak ka-pimuanua tshipa takuan tshetshi nishpaikanitsh auassatsh mitshiminu. Ka apissishisht Gordon Ramsey mak Ratatouille.



**M**ishta-animiuatsh auassatsh ute utenatsh mak ui tshissenimushuatsh. Ispitenitakuan tshitshue innu-aianimuan tanite tshinaiu innuatsh. Nutshimitsh tshe taianitshi tshimish-kashunai mak tshiminuenimunai. Unitaiakue tshitaianimuanu mak eshi-inniuiak<sup>u</sup> tshika tshi tshissenimushunai. Etatu animanitamuatsh auenitshi eka tshi aimitautshi. Kuet unitatsh. Nuitsheuakan nuitshiau tshetshi mishinanitshet mak tshetshi tshishkutamashut ke uin.

**T**shika ui nakatueniteia tshitinniunnu mak eshi-aianimueiak<sup>u</sup> mamu. Tshishkutamashutau eshi-manukashutsh. Tshipa takuan e mishatsh katshishkutamatsheutshuap-mitshuap, nipeuna tshetshi takuatshi. Mak tshetshi piminuanitsh. Nui tshishkutamashunai tshetshi kashiunatsh innu-akunishkueuna mak ashtishatsh, mitashatsh, ashamatsh, anita mishue ka iapatshakanua. Nui tshisseniten mak nui tshishkutamashun pishakaissina. Nikaun ashamau innu-mitshiminu nikanisha, eku eshi eka tat nukum nashtish an ama takuan. Auassatsh tshipa ituteuatsh metutishanitshi, mak ussinitshishuatsh. Auassatsh ka-apashishutshi tshika ui tshishkutamashuatsh tshetshi innu-aianimuetsh. Etatu tshipa tauatsh kauaitshinueshitsh mak tshipa takuan kauaitshinitunantish mitshuap. Mishue auen tshipa minuenitamuatsh takuanitshi enua tshekuai.

**I**nnuatsh tshipa innu-aianimueuatsh ete uitshuatsh. Tshipa uitsheuatsh enua utauassimuaua tshetshi innu-aianimuenitshi. Tshipa tshishkutamueuatsh enu tshetshi issishuenitshi “tshekuau u ue” ? Etatu tshipa uetinu innu tshishkutamuatsh. Tshipa tshissenitamuatsh etatu mashititsh. Eku tshissenitatsh auassatsh tshipa tshi tshishkutamueuatsh kie uinuau utauassimuaua.



Mishetuatsch auenitshi umenu tutatsh atusseun-  
nu ute, nutaun Shuashim tshe tshissenitak etatu  
uin. Tshika ui natauau ui uitshinikutshinekue.  
Minuenitakushu nutaun. Takutsh kutakatsh  
auenitshi, Manishan, Jerry, Penash mak Nuna  
minuenitakushuatsh innuatsh. Ui uitshinueuatsh  
mak tshishkutamatshueatsh mak takuatsh uta  
tshekuan e tutakanatsh. Nui uauiten anite  
uetuteian mak ama shuka minuau anite  
uetuteian. Nitshishkutamashunapan ete  
Utshimassitsh peikushteu tatu-pishimua  
eshakumipipuna. Nutaun mushinau nitutani-  
kunai ete katshishkutamatsheutshuapitsh nin,  
mak Maniai mak Kananish. Nitshinatsh nititaiu  
nin kunuitshi mak nutaun nitutanikunai nin ete  
katshishkutamatsheutshuapitsh mak  
nipimuteiai tshaeiatshi. Peikushteu tatu-  
pishimua nitshishkutamashunai anite katshish-  
kutamatsheutshuapitsh, kuets kau atusseiatsh.  
Ama takuanipan tshetshi nutapinatsh napitshi  
enu auassatsh ka tutuakanutshi anutsh.  
Nutuan nutameshepan uipatsh mak nuauitshi-  
apaiai etussetshi anita nissi-pishimua.  
Nimamunaiai mishkumin mak nameshat  
anite ashtshutshuapitsh tshetshi minushitsh  
nameshatsh. Katshi puni-tshishkutamashu-  
natshi kuets nutaun niminikunai atusseunnu  
enu kakushkaun, mak eshi-minukuakanitsh  
nameshatsh mak kutaka tshekuai ishpish ete  
ashutash-miashtakaia nuash nianeu-tatu-  
miashtakaia. Niminueniteiai etutakanakunitshi  
utenatsh muk<sup>U</sup> apissish. Nuitsheuaiatsh nui-  
tsheuakanaiatsh apissish kuets kau pushinatsh  
ut nutaun tshimaiiai 35km ete ispishinakuan.  
Eukuan eshi-nitautshinan, nishteshatsh, mak  
nimishatsh, nianeu mamu nitatishinai. Eku  
anutsh u ashutash nitatishinai.

Nipa minueniteiapan etatu nutaun tshishku-  
tamutakue enu innu-eshinniut. Peik<sup>U</sup> tshekuan  
mushinau e tutamatsh, ninataiapeiai nianeu  
pishimukuaia tshinetshishepapanitshi. Nutaun  
peikunnu ashu patetash-tatishinuaua aiapina  
pashtauat, put mak anite etatu.

Eku nameshatsh niminukuaiatsh mak nipish-  
kashaueiai, mak eukuan mushinau etatusse-  
iatsh eshakumitshishikaua patush eka etatuau  
nameshatsh, eku patush puni-atussetatsh. Kuets  
nitshishkutamashunatsh minuatsch. Eku pipuni-  
tshi, nutaun nitutanikunai ete nutshimitsh, ekute  
tshishkutamakuiatsh eshi-inniut innu. Peik<sup>U</sup>  
tshekuan nitshissenitei mak nitshishkutamak<sup>U</sup>  
mushinau tshetshi minueian mitshim nepa-  
taiani. Namaieun nin, muk<sup>U</sup> tshetshi ashamakuau  
anitsh auenitshi uatsheukua enatuiuitsh.  
Eukuan nishtam tshe tutamin. Eukuan tshe tuta-  
min tanite tshin an innu. E nanatuiuna-  
nitshi, nishteshatsh, ama nikaiueniteiai mitshim  
nepataiatshi. Niminaiatsh nuitsheuakanaiatsh.  
Eukuannu innu eshi-inniut tanite. Kutakatsh  
kanatuiutsh peikutau kie uinuau eukuan etitsh.  
Ishpitenitakuan tshetshi kaiuenitamak<sup>U</sup> tshe-  
kuan ka nishi-tshishkutamakuiak<sup>U</sup> ete uipatsh,  
mak ama shuka tauatsh tshash tshishennuatsh.  
Kutakatsh tutamuatsch tshetshi eka unikuati-  
kanitsh anite uetshipanitsh. Ninatutuau Shikaina  
mak essishuet tshekuannu nasht an tapueu.  
Unitaiakue tshitaianimuauu mishue tshekuan  
tshika unitaiu.



# NACHELLE POKER

Nasheu atakunikaia ene nishuau ka pimutanitsh.



10 Innu Aimitau:  
Natuashish Eshi-animuanitsh kaianimuekatakanitsh



# TATAPAN AIAMUNA: Tshekuan tshipa tuteiai tshetshi eka uinitaiak<sup>u</sup> tshtaianimueunnu mak eshi-inniuiak<sup>u</sup>?

**P**eikunnu tatishuat auenitshi nanimuekatatsh tan tshe tutamuak<sup>u</sup> tshetshi eka unitaiak<sup>u</sup> tshitinniunnu mak tshitaianimueunnu, mak tshekuan papeik<sup>u</sup> auenitshi tshipa tutamuatsh, katshishkutamatsheutshuap, utshimauatsh mak anite auenitshi etusseshitsh. Maue uneuepanitsh tshekuan essishuanitsh. Tatapan kaianimuetsh minushu tshe ishinakushutsh Peik<sup>u</sup>-pakueshikan, Pineuatsh, Petapan, mak kutakatsh ishinikatuatsh Nipishapun mak Nameshatsh.

## Tshekuan nipa tute nin e peikussian?

- Innu-aianimue ete tshitshuatsh auassatsh e tatuai.
- Tshishkutamutsh tshetshi innu-aianimuetsh tshishimuauatsh.
- Tshishkutamuikutsh katshishkutamatshetsh tshetshi katshiuutsh innu-aianimuanu.
- Tshishkutamuikutsh ete utatsh auassatsh tshetshi innu-aianimuetsh.
- Tshishkutamuikutsh innu-aianimuanu kutakatsh auassatsh.
- Uauitshaushutsh pemutanitshi, nishkuesatsh mak napessatsh pemutetuai.
- Mushinau piminuek<sup>u</sup> innu-mitshim iapitsh.
- Minekutsh auassatsh tshetshi nakatuapatashetsh aeshisha menukuakanitshi.
- Apatshita innu-aimuna mekuatsh naianimueni.
- Tshishkutamashuk<sup>u</sup> tshetshi aimitaiek<sup>u</sup> mak tshetshi innushtaiek<sup>u</sup>.
- Ishpitenamituk<sup>u</sup> mak ishpitenimeukutsh kutakatsh innuatsh.
- Tshishkutamashutau tshitinniunnu mak anite uetuteiak<sup>u</sup>.
- Uapatinuek<sup>u</sup> akunakanatsh anitsh aeshishatsh, mak atshitashuna kie unishinata-nikaia.
- Uauitamuk<sup>u</sup> tipatshimuna mak anite e taiek<sup>u</sup> nutshimitsh.
- Mak eka petushtauk<sup>u</sup> Starlink ete nutshimitsh.
- Nin kakeshau anite innu-utenatsh e taiani nitshishkutamashun eshi-inniut innu mak anite uetutet, uauitshinuek<sup>u</sup> tshekuan e tuktakanitshi mak ete ka kushpinanua.
- Kutshita tshetshi innu-aianimun, mak itute ete tshishkutamashunanitshi innu-aianimun anita nishtutshishik<sup>u</sup> ete katshishkutamatsheutshuapitsh, ashutash mak pushk<sup>u</sup> tshi tshipanu mak tshetshi tshissenitamin eshi-inniunanutsh.
- Uapatinue eshpish ui tutamin mak apatshita enua tshekuaia manamatenitaman, eka muk<sup>u</sup> aianimuekatak.



# Tshekuan tshipa tutamuatsh tshikanishinuatsh ?

- Innu-aianimuak<sup>u</sup>, innu-aiminikutsh auassatsh, tshishkutamuikutsh auassatsh innu-aianimunnu mak innu-nikamuna.
- Uitshi-metuemikutsh auassatsh mak innu-aimekutsh mak anu eshi-innunitshi innua, mak metuakanikutsh enu tshetshi thissenitatsh eshi-inniunanitsh.
- Mashinitamuek<sup>u</sup> tshekuan eshinkatetsh anite tshitshuauatsh muk<sup>u</sup> tshetshi tshissitakua auassatsh eshinkatenitsh tshekuannu mak ka unikuata tshetshi innu-aianimun.
- Tshishkutamashu tshetshi aimitan mak tshetshi innushtan.
- Tatan anite tshitshuatsh enua “a e i u” kapa-peikushteshitsh mak atshitashuna.
- Uauitshinue utenatsh innu-aianimun tshishkutamashunanitshi.
- Tshipauikutsh kashetshimakanitsh mak kutaka tshekuana, eka shuka minikutsh auassatsh tshetshi mishta-nutshikatsh auenua tshekuaia mak eka tshitapatanikutsh auassishatsh enua “Cocomelon”.
- Uapatinikutsh auassatsh eshi-tutakanitsh innu-aitunnu mak tshishkutamuikutsh eshi-inniunanitsh, innu eshinniut.
- Tshishkutamuikutsh auassatsh enua ashama.
- Ushitak<sup>u</sup> mak apatshitak<sup>u</sup> innu etashpashut.
- Piminuek<sup>u</sup> innu-mitshim.
- Tshe minutekutsh auassatsh tshetshi kussetsh mak tshetshi nikutetsh.
- Tipatshimushtuikutsh mak uitamuekutsh atanukaiai.
- Kushpaunekutsh auassatsh put kie tshetshi pimutetsh.



- Tshishkutamashuk<sup>u</sup> mak tshishkutamatshek<sup>u</sup> enu innu eshpitenitakunitsh eshi-inniut.
- Pishtepanikutsh tshishennuatsh mak utipatshimunuaua tshet natutuekutsh ete minetuanitsh.
- Ukaumauatsh mak utaumauatsh tshipa uapatinueuatsh kashetshimakanitshi, mashinikaia enua uipatsh-innuatsh ka tatsh ute.
- Ushinikutsh kanunissatsh enua innu-aianimuaiai tshetshi unishtetshi anita kanunatsh.
- Uitamuiikutsh tshitauassimauatsh tshetshi eka takanakuau ukamituetishimuaua; eka tapuetuikutsh tshetshi natushtatsh ete kashishkutamatsheutshuapits.
- Ushitak<sup>u</sup> etatuau tshatutek<sup>u</sup> tshetshi uapa matsh kutakuatsh innuatsh, enu innu mushinau ka tutak.



# Tshekuannu katshishkutamatsheutshuap tshipa tutam<sup>u</sup> ?

## PITUKAMITSH KATSHISHKUTAMATSHEUTSHUAPITSH

- Menuatsh anite tshipa tutakanu tshekuan ua tshishkutamashunanitsh mak tshetshi metuananitsh.
- Tshipa akutakanu innu-kussikuashuna mak unashinatanikaia anite pitukamitsh atusseutshuapitsh.
- Innu kaiatussesshitsh uinuau tshetshi atushkatakauau innu-aituna metuakaiai.
- Minuenitamuek<sup>u</sup> auassatsh tshashitatuau utatusseunuau, tan auass minuenitam<sup>u</sup> katshi tshishi-tutatshi utatusseun, mak eka uaushinuekutsh, tanite auassatsh anitsh shakuenimutsh.
- Tshipa takuan K-6 innu-aimun katshishkutamashunanitsh. Mishue tshishkuta muekuatsh auassatsh innu-aiamunnu mak kaiapashissishitsh auassatsh.
- Tshipa takuan anite mishue auassatsh tshetshi tshishutamukanitsh innu-aimuna, namaieut muk<sup>u</sup> anita tshishkutamukanitsh innu-aiamuna.
- Uitamuiikutsh auassatsh tshetshi innu-aianimuetsh mak tshetshi innu-aimitutsh.
- Innu-aiamun-katshishkutama tsheshishkueuatsh mak innu-katshishkutamatshetsh mak kaitshat kashkutimatsheshishkueua neush etatu tshipa atusseuatsh.
- Eshakuma peikuau maiashtakaia tshipa tutakanu tshekuan enu auassatsh tshipa nishi-metueuatsh.
- Tshishkutimatshek<sup>u</sup> innu-kapapeikushteshiti, atshitashuna, mak aueshishatsh kie eshini-katakanitsh aueshishatsh.
- Kamamishititsh auassatsh tshetshi aimituatsh innu-mashinanikaia enua kaiapishissinuani auassa.
- Metuakaia mak eshi-metuanitshi innu eshi-metuet.



- Etatu tshipa minakanuatsh auassatsh tshetshi tshiueshtatsh enu innu-utatusseunnua ete uitshuauatsh tshetshi tutatsh.
- Pishtepanitak<sup>u</sup> tipatshimuna mak atinukuaiatsh.
- Ueshkatshi innu eshi-tshishkutamashunanitshi tshetshi etatu takuatshi.
- Tshipa takuaia kashkutamatsheutshauptsh tshekuaia tshe apatshitakanitshi, kashetshimakanitsh mashinanikaia, metuakaia, Innu auassatsh tshe nishi-innu-aianimuetsh ka-ishi-shetshimakanitshi, tshetshi apatshakanitshi.
- Ushitak<sup>u</sup> innu tshipa nashapatshitaiau tshe ishi-tshishkutamatshek<sup>u</sup>, (kanunatsh, akunikaiatsh) tshetshi auassatsh tshiueshtatsh ukaumuauatsh tshetshi tshishkutamuatsh utuassimuaua.
- Tshipa takuaiai metuakaia enu auassatsh tshishkutamashutsh tshetshi etatu kassiatsh tshekuannu.

# Tshekuannu katshishkutamatsheutshuap tshipa tutam<sup>u</sup> ?

## PITUKAMITSH KATSHISHKUTAMATSHEUTSHUAPITSH



- Uauitamuk<sup>u</sup> etatu innu-tipatshimuna mak ete uipatsh tipatshimuna.
- Utanakanatsh peik<sup>u</sup> pishimua tshetshi muk<sup>u</sup> innu- aianimuanitsh
- Tshe minikutsh auassatsh tshekuannu tshetshi kaniutsh eku etatu tshika kutshitauatsh innu.
- Ukaumuauatsh mak katshishkutamatshet etatu tshipa atushkatamuatsh innu-aianimuannu.
- Uapatinekutsh auassatsh enua innu-kashetshimakanitshi.
- Tutamuk<sup>u</sup> an muk<sup>u</sup> tshetshi tipatshimushtuakanitsh auassatsh.
- Uapatiniuek<sup>u</sup> et-atushkanitsh innu tshetshi tshissenitak mak tshe nishtutak.
- Tshetshi innushtetsh iapitsh anita akunikanitsh.
- Tshetshi tshishkutamashutsh auassatsh tshituapekanikannu.
- Tshishkutamuekutsh auassatsh tshetshi kussikuatattsh innu-apatshitauna.
- Tshishipanitatak<sup>u</sup> katshi puni-tshishkutamashunanitshi tshetshi tshishkutamashunanitsh innu-aimun.
- Auassatsh tshetshi tshishkutamuatsh katshishkutamatshenitshi innu-aianimuannu.
- Tshishkutamatshhek<sup>u</sup> innu-aiameun.
- Uishamekutsh tshishennuatsh tshetshi tipatshimutsh ete katshishkutamatsheutshuapitsh mak auassatsh tshetshi natutuatsh.
- kie tshetshi katshishkutamashet uitinimuat auassa ukamatuettshiminu.
- Minikuatsh auassa tshetshi innu-aianimuettsh.
- Uauita mak uapitinue tshekuan tshishkutamatshu mak minu-uitam<sup>u</sup> katshishkutamatshet.
- Tshipa tutakanu auenitshi etatu kassiuatsh enu innu-aimun.
- Tshipa tutakanu tshetshi etatu tshishkutamashunanitsh innu-aianimuan anitsh katshishku tamatsheutshuapitsh mak uikanishimuatsh.
- Uishamek<sup>u</sup> tshishennu tshetshi tipatshimushtuat auassa.

# Tshekuannu katshishkutamatshetuap tshipa tutam<sup>u</sup> ?

## ANITA NITASSINATSH

- Uishamekutsh auenitshi tshetshi tshishkutamatshetsh.
- Tshipa takuannu auassatsh anite tshetshi atusseshetsh enu innu-aitunnu tshetshi tshishkutamashutsh ashama kanatuiuanua, ka-kushkanua, mak ka-pimianua mak eshi-minukuakanitsh aue shishatsh.
- Ka nitau natuiuatsh tshetshi takuanatsh tshe tshishkutamatshetsh.
- Tshishkutamuekutsh ishkuessatsh tshe ishi-minukuatsh mistikuaia.
- Tshipa ushitakanu mitshuap enu katshishkutamatshetuap eshinakuatsh tshetshi tshishkutamashunanitsh mak tshetshi takuatshi nipeuna.
- Tshipa tutakanu katshishkutamatshetuap pitsh auassatsh tshetshi nitutetsh nutshi mitsh.
- Mukushan tshipa tutakanu, tshipa tshishkutamuakanuatsh auassatsh tshetshi minukatsh atiku-ushkaia.
- Tshishkutamatshetu<sup>u</sup> innu-natukuna mak eshinkatetshi.
- Tshipa tshimitakanu innutshuap tshetshi auassatsh tshishkutamuakanitsh innu-aitunnu (ka-pimanuanua, mak ka kushikuashunanua).



## TSHISHKUTAMASHUNANITSH

- Tshetshi uaitamuakanitsh anitsh uessituau katshishkutamatshetsh, mak auassatsh enu innu-aitunnu.
- Tshishkutamuakanutsh katshishkutamatshetsh mak auenitshi anite kueshtetshe ute etutetsh enu innua eshi-iniunitshi, mak enu eshi-aianimuanitsh.
- Mishue katshishkutamatshetsh tshipa tshishkutamashuatsh passe innu-aianimuanu.
- Tshishkutamuekutsh katshishkutamatshetsh mak innu-kaiatusseshitsh tshetshi tshissenitakuau tshe ishi-innu-tshishkutamatshetsh enu innu-aimunnu, mak kutak auen iatapa eshi-tshitapatak tshekuana.

### 16 Innu Aimitau:

Natuashish Eshi-aianimuanitsh kaianimuekatakanitsh

# Tan tshipa tutamuatsh utshimauatsh mak anite kutakatsh etussetsh ?

- Mamu tshika ui atushkatakanu ute utenatsh mak anite utenatsh.
- Etatu tutamuk<sup>u</sup> tshetshi takuatsh innu aianimuanitsh mak tshe innu-aiminitunek<sup>u</sup>.
- Etatu tutamuk<sup>u</sup> auassatsh tshipa innu-metueuatsh mak mishue innuatsh ute utenatsh.
- Tshipa tutakanu auassatsh tshetshi utshimautsh mak tshetshi uauitshiakanatsh.
- Etatu tshipa tshitapamakanuatsh auassatsh mak tshipa uapatakanu auassatsh etenitatsh, etatu put tshipa ui tutamuatsh auassatsh tshekuannu.
- Etatu tshipa uishamakanuatsh auassatsh tshetshi pimutetsh pemutanitshi.
- Eku kushpitanikutsh auassatsh.
- Tshipa pimpanu innu-aimun tshetshi tshishkutamashunanitsh uetakushitshi.
- Uauitshekutsh anitsh auenitshi eka kash-takatutumutshi enu innu-aianimuanu mak eshi-inniunananitsh.
- Tutamuk<sup>u</sup> ume mak apatshinikutsh akunikaiatsh
- Uapatinuek<sup>u</sup> innu-kashetshimakanitsh.
- Tshipa takuan anitsh auassatsh tshetshi innu-metuetsh (drama club).
- Tshipa takuan kaiapashissishisht.
- Auassatsh kametuakanitsh-mitshuap tshetshi tshishkutamashunanitsh peikuau minashtakaia.
- Tshipa nanatuapatakanu anite tshipa tutakanu auassatsh tshetshi tshishkutamashutsh enu eshi-tshimitakanatsh innutshuapinu mak etatu takanitshi assikumaia.
- Tshipa tshishipanitakanu napessatsh mak ishkuessatsh tshetshi tshishkutamuakanatsh innu-atusseunnu.
- Utshimauatsh etatu tshetshi mupitsh ete katshishkutamatsheutshuapitsh.



- Etatu tshipa takuan shuniaiu tshetshi takuatsh innu-aimun mak eshi-inniut auen tshetshi tshishkutamashunanitsh.
- Shuniaiu tshetshi tshimitakanitsh innu-aitun-mitshuap.
- Mishue anite shuniaiu tshetshi papanitsh ute auenitshi etussetsh ute Natuashish mak anite Health Canada.
- Tshipa takuan tshetshi tshimitakanitsh mak tshe nishi-pimipanitsh eku tshipa nashatakanu.
- Tshipa tshiminakanuatsh auenitshi tshetshi pimipanitatsh enu tshekuan ua tutakanatsh.
- Mishue auei tshipa uitshinue ute tshute namanash.
- Tshitshipanitak<sup>u</sup> innu-aitun ete katshishkutamatsheutshuapitsh.
- Ishpitenimekutsh mishue auenitshi ute etatsh tshutenaminatsh.

# Tanite tshe uitshi-atussemitunanak<sup>u</sup>?

- Mamu petutek<sup>u</sup> etashiek<sup>u</sup> uitshi-atussemitutau
- Minuenitamik<sup>u</sup> mak ishpenimitik<sup>u</sup>
- Uauitshinitik<sup>u</sup>
- Aimitik<sup>u</sup> mak uitshi-atussemitik<sup>u</sup>
- Nakatuenitetau tshekuan, tshuteniminai mak katshishkutamatsheutshuap
- Minu-tshitapatamik<sup>u</sup> tshekuannu ua tutamek<sup>u</sup>
- Aiamituashik<sup>u</sup> mak aimituekutsh kutakatsh tshetshi minu-inniutsh
- Atushkatamik<sup>u</sup> innu-katshishkutamatsheutshuap
- Etatu mamu tshika ui tutakanu tshetshi minupanitsh
- Uapatiniueu tshipa tshi tuten
- Mushinau tshetshi aianimuakanitshi tanta e taianitshi



**“Mamu ui nikaushtetau mak kutshitatau an tshekuan ka-tshika ui Tshaseniteai tshe animash mak eshipishiak tshetshi shkutimuakutsh stuassiminutsh tshetshi innu aianimuetsht. Tshishatsh tshapatshi tshishipinau tshetshi shkutamuekutsh.”**

-Tatipan ka-aianimuanua

